

重修河曲縣志序

今上御極之元年秦回倡亂余從戎蒲坂河曲遠據上游時黃惺齋觀察總辦州屬團練郵遞軍書附寄縣志採遺四卷閱其序乃道光癸卯歲刊成於貴州大定府署原以備他日修志之用意至善也三十年爲一世其間人事變遷興廢得失有不可不紀者紀之以實免其久而失真非地方官之責乎 葆卿金司馬宰是邑者五年修葺城垣礮卡建立書院義學舉報名宦鄉賢事必竭誠日無虛度而於戎馬雜沓間亟亟以修志爲已任是真不畏難不苟安者矣余州官也例得書名簡端而尤喜 葆卿司馬持躬任

事始終不渝其節輒以不文之文文之亦以紀其實云爾惺齋若
得觀是書之成其快意又當何如也

大清同治十一年十月吉日

誥授中憲大夫道銜在任候補知府知保德直隸州事桐城姚慶和撰

重修河曲縣志序

周禮小史掌邦國之志外史掌四方之志小行人掌邦國賓客之禮籍以待四方之使者舉凡風俗奢儉疆域廣袤與夫人物之秀良師儒之教育靡不畢具輶軒采錄勒成書以進於王卽今所謂郡邑志也夫郡邑之有志其非徒徵文考獻之謂其謂維風化闡幽貞損益古今興革利弊政事於焉稽覈士民於焉勸懲苟非殫見洽聞旁搜遠紹諮訪周而且確抉擇當而且精以云纂修誠非易易江文通謂修史莫難於志其信然歟顧或避阿徇之謂畏弇鄙之譏聽是邦之文物典章殘缺失次而不廣爲蒐輯壽諸棗梨

抑又守土者之過矣河曲縣志自前明嘉靖萬厯年間南坡王鑛編輯於前苗慎齋京兆朝陽續修於後分門別類紀載周詳逮崇禎三年冬遭流寇王加應之變梓板盡付回祿嗣經前令錢公永守修復成編

國朝順治四年至道光十年厯經前令嵎輪馬公雲舉捷軒楊公廷標心田曹公春曉以次踵修迄今又四十二年矣其間自職官以至藝文各類之當增者何可悉數使不亟加訂證咎將奚辭余於同治五年秋來蒞斯邑厯年籌捐經費辦理工程非敢謂百廢俱興或不致貽羞於瘝曠爾獨縣志雖經曹公修輯已厯有年且於

列聖綸言各項典禮均未詳載終覺闕然況此數十年中天時之妖祥政蹟之純備物產之增益風氣之轉移兵警之大災團練之新法壇壝廟宇之移建文職武弁之遞更孝義節烈之挺生甲第科名之繼起所宜踵而紀之表而彰之者指不勝屈因不揣謏陋力任重修參贊資諸邑紳採訪責之齋長復得舊城黃惺齋觀察宅中所著縣志採遺四卷重加刪訂更以得自採訪者入之大抵增者居多於前志未嘗妄爲筆削始於十年十一月竣於十一年十月第成書太速籌款頗難簿領匆匆草創爲此掎摭不無遺漏校讎或有舛譌率爾操觚知不免爲大雅所笑惟願後之君子討論而

潤色之俾禮樂文章燦然大備是則余之所厚望也夫

大清同治十一年太歲在元默涖灘孟冬之月上澣穀旦

誥授奉政大夫同知用知保德州河曲縣事山陰葆卿金福增謹序

重修河曲縣志序

邑之有志所以存文獻紀風土闡幽貞維名教也以順天道則志
星野祥異之考徵以奉神明則志廟祠壇壝之典禮以勸官守則
志流風善政之貽留以畫封疆則志城堡山川之形勝以勵人品
則志前賢往哲嘉言懿行之昭垂志搢紳先生而人知家聲之重
志耆儒碩德而人知鄉望之重志貢舉甲第而人知科名之重而
且營汛兵警之志以講武也藝文詩歌之志以崇文也田賦物產
之志以厚生也風尚勤儉之志以敦俗也以迄孝子悌弟忠臣義
士節婦烈女載在簡冊尤足激發人心而大廉恥之防邑志之重

也固如是河曲縣志自前明京兆苗慎齋先生創修復重修於

國初馬嶠輪楊捷軒縣尹踵修於道光八年曹心田明府至於今而
又閱四十餘年矣其間如星野城堡山川廟祠壇壝此歷久不變
無可增者也然廟祠或缺典禮壇壝或有移建山川城堡亦或稽
考詳畧之不周至祥異則象緯迭更人品則賢哲間生官守則循
良代有貢舉甲第聯鑣而上搢紳耆德接踵而興他若物產之有
加也風尚之有遷也兵警之有變也藝文之時有著作也此其當
增者也又况孝子悌弟忠臣義士節婦烈女或淹沒而弗彰則民
無所激發無所激發則不知重廉恥此人心之患也 邑侯葆

金公以清介持躬出宰河曲下車之始適當陝氛不靖首以培城垣訓團練爲要務次之以重修

文廟興復書院創建義學凡所當爲者五年之中靡不次第畢舉乃復慨然以續修縣志爲已任夫縣志之當修也審矣但輞輪諸公修於太平無事之秋其爲時也暇暇則搜羅較易今則縣所轄長灘地方新遭兵燹黃河東西防務未撤桓桓虎貔之勇千營霧合萬竈雲連而公乃留心於邑志之修其爲時也猝猝則採擇較難公不避其難而爲之以爲天下事必待其暇而後爲之事之爲焉者寡矣古人云士大夫一日立乎其位則一日業乎其官其

公之謂歟是舉也纂言稽事 公總其成採訪則委齋長贊襄

則資邑紳取多用宏則得力於吾師 黃惺齋觀察所著縣志採

遺四卷而其修之之法前志悉仍其舊續志要存其真如城鄉圖

防河西兵警此數百年創見之事在所必稽如象緯循良賢哲貢

舉甲第摺紳耆德物產風尚以及廟祀之典禮壇壝之移建當

者增之卽城堡山川之無可增者稽載有遺則補之如孝子悌弟

忠臣義士節婦烈女固必核實以紀之卽傳誌詩歌之類亦必有

關風化者始錄之旣博採而不遺亦有闕而無濫開修於辛未十

一月告成於壬申十月此亦足見 邑侯之敏則有功矣抑余又

有說焉修志文事也團防武備也二者事分而理實合昔梁王欲制勝雪恥孟子告以修其孝悌忠信可使制梃以撻秦楚之堅甲利兵天啟初邊事告急馮少墟先生時爲副院立會講學以激發人忠義之心此其說似迂而要其理則不易也志旣成吾知邑之人必指而目之曰某也孝某也悌某也忠義節烈名載青簡垂之無窮孝悌忠義之心有不油然而生者乎廉恥存而人心正將見禮義堅於甲冑樽俎威於折衝上可以裨

國家文教之敷下亦可以靖一邑兵刑之氣豈不懿歟

同治十一年歲次壬申陽月吉日

賜同進士出身

勅授文林郎候選府學教授保德張兆魁拜撰

原序

誌與史異史彰善癉惡筆削維嚴誌則善善從長寓懲於勸而已而分門別類紀往徵今則大小雖判而所係之重並同河邑誌書邑紳南坡王鑛編集於前給諫苗慎齋重修於後紀載亦備矣崇禎三年庚午冬流寇王加應等踞城肆掠梓板付之回祿而一邑之典又缺嗣宰斯土者遼海錢公留心修復次第成編順治初馬公岫輪又刪改而增益之編次更井井有條梓未終而遇變事卽中輟楊公捷軒蒞任首重是舉亟爲成之而典之缺者遂燦然畢具迄今百八十年不獨篇殘簡斷其間如縣治移駐驛站新增員

并改設兵丁裁汰官師廉俸書役工食或較增於前或屢減於後沿革殆不一端而厯任文武職官及邑中科甲歲薦仕宦封廕已不能詳悉孝義節烈亦多隱沒不彰若遲之又久卽有心殷補輯者文獻無徵徒增浩歎爰不揣固陋力搜各房稿案移查黌案旁稽碑記參考通志於近事尤廣爲採訪隨有所得隨時叙入列原誌所載於各篇之首而以得自採訪者彙附之其有今制與昔異者但詳叙今制而原誌所載不復贅有原誌所未詳者若星野若風俗若武職千總以下若行伍若例仕例貢考職捐職五世同堂等條則據所採訪以補之誌中論說明而確者胥仍其舊間有時

移勢易者則畧參以臆說至內外與蒙古向以黃河爲界河以西
縣中不爲經理自牌界旣分附近草地歸縣兼管亦詳考四至交
界及其地名另立一篇附於其末始於道光己丑仲秋竣於庚寅
季夏謹捐廉俸刊刻成卷非敢期不朽也俾後之官斯民斯者有
所稽考且因以決景從勵進修耳其有不醕不備者俟高明更正
之續增之至於完善以與史爭輝斯則幸甚是爲序

大清道光十年歲次庚寅季夏吉日

賜進士出身知保德州河曲縣事戊子科山西鄉試同考試官心田

曹春曉撰

原序

聞之古稱不朽之物紀故實垂鑒戒所云文獻足徵者誌是已所
係詎不重哉邑誌纂自南坡王公於嘉靖七年延今七十餘載中
間事變之更紀載之缺未可縷指其尤者如城垣包砌官兵添設
名宦鄉賢之祀官師貢舉之詳皆所未誌此補輯之不無所待而
亦不可緩者也余不佞寡昧曷堪是任顧以邑侯任公暨諸士大
夫惓惓屬以桑梓不朽之託辭弗獲已始忘寡昧爲之采輯蒐徃
籍稽故典詢時事可因者因如星野山川廟舍之類而不病於襲
可入者入如城濠兵馬錢穀選舉節烈之類而不嫌於增可刪者